

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : TUAN TEO KOK SEONG
[RASAH]**

TARIKH : 23 OKTOBER 2017

**SOALAN : Tuan Teo Kok Seong [Rasah] minta
MENTERI LUAR NEGERI menyatakan :-**

- (a) secara terperinci berapakah kos yang dibelanjakan oleh Kerajaan untuk membiayai perjumpaan Perdana Menteri Malaysia dengan Presiden Amerika Syarikat pada 13 September 2017 di Washington; dan
- (b) apakah hasil dan manfaat yang diperolehi oleh rakyat Malaysia daripada perjumpaan tersebut.

JAWAPAN

Tuan Yang di-Pertua,

Saya ingin mengucapkan terima kasih kepada Yang Berhormat Rasah atas pertanyaan yang dikemukakan.

Tuan Yang di-Pertua,

2. Hubungan dua hala Malaysia dan Amerika Syarikat telah terjalin sejak 1957. Malaysia dan Amerika Syarikat mempunyai hubungan dua hala yang mesra serta kerjasama yang erat dalam pelbagai bidang. Hubungan ini telah dipertingkatkan ke tahap Perkongsian Komprehensif sejak tahun 2014 di dalam pelbagai bidang kerjasama utama, seperti politik, ekonomi, keselamatan, pertahanan dan sebagainya.

3. Untuk makluman ahli Dewan, Amerika Syarikat merupakan rakan dagang ketiga terbesar bagi Malaysia pada tahun 2016 dengan jumlah dagangan sebanyak RM135.9 billion.

Tuan Yang di-Pertua,

4. Perbelanjaan lawatan kerja ke Washington DC, Amerika Syarikat yang dibuat oleh YAB Perdana Menteri pada 9-16 September 2017 adalah berdasarkan Akta Ahli Parlimen (Saraan) 1980 (Akta 237) kemudahan Elaun dan Keistimewaan bagi YAB Perdana Menteri.

89

5. Perbelanjaan tersebut adalah meliputi perbelanjaan penerbangan, penginapan, pengangkutan, elaun makan, dobi, telefon dan lain-lain. Perbelanjaan YAB PM dan ahli rombongan adalah mengikut kadar yang ditetapkan dari semasa ke semasa.

Tuan Yang di-Pertua,

6. Lawatan kerja ini telah berjalan dengan jayanya, dan sememangnya telah meningkatkan hubungan dua hala Malaysia-Amerika Syarikat baik dari segi politik dan ekonomi serta kerjasama antarabangsa. Pelbagai bidang kerjasama dua hala telah dibincangkan terutamanya dalam bidang perdagangan, pelaburan, keselamatan serta tindakan-tindakan membanteras keganasan.

7. Dalam hal perdagangan dan pelaburan, Yang Amat Berhormat Perdana Menteri telah menjelaskan bahawa Malaysia telah menawarkan *value proposition* kepada Amerika Syarikat dengan peningkatan pelaburan daripada Kumpulan Wang Simpanan Pekerja (KWSP), Khazanah Nasional Berhad (Khazanah) dan kerjasama antara Malaysia Airlines Berhad (MAB) dengan The Boeing Company (Boeing). Untuk makluman ahli Dewan, pelaburan sedia ada oleh KWSP di Amerika Syarikat adalah bernilai USD 7 billion dalam bentuk ekuiti, dan pelaburan ini telah bermula sejak tahun 2008. Khazanah pula memiliki pelaburan bernilai USD400 juta dalam syarikat berteknologi tinggi di Silicon Valley dan sedang meneliti beberapa pelaburan baru dalam usaha meningkatkan dana pelaburan di negara tersebut.

8. Pelaburan jangka panjang ini bukan suatu perkara baru. Malahan peningkatan jumlah pelaburan Malaysia di Amerika Syarikat dijangka akan memberi pulangan yang memberangsangkan kepada negara.
9. Pemeteraan Memorandum Persefahaman (MoU) di antara MAB dan Boeing dengan pembelian pesawat-pesawat baru dan penyelenggaraan pesawat adalah sejajar dengan pelan transformasi MAB dan merupakan pilihan terbaik yang dilengkapi dengan teknologi terkini.
10. Selain daripada membincangkan kerjasama dua hala Malaysia dan Amerika Syarikat, beberapa isu antarabangsa turut dibincangkan oleh Yang Amat Berhormat Perdana Menteri dengan Presiden Trump adalah situasi di Semenanjung Korea, penindasan terhadap etnik Rohingya di Myanmar dan isu-isu berkenaan Laut China Selatan.

Tuan Yang di-Pertua,

11. Layanan istimewa yang diterima oleh Yang Amat Berhormat Perdana Menteri dan delegasi yang telah diberi oleh Presiden Trump dan ahli-ahli Kabinet beliau jelas membuktikan keakraban persahabatan yang terjalin antara kedua-dua pemimpin negara. Kesungguhan Amerika Syarikat untuk memahami situasi dan tindakan yang telah diambil oleh Malaysia dalam pelbagai isu antarabangsa menunjukkan bahawa negara ini mempunyai keupayaan untuk mengengahkan isu-isu berkepentingan bersama kepada kuasa-kuasa besar dunia.

Sekian, terima kasih.